

Visoki predstavnik odredio 15. mart kao krajnji rok Ministarstvu odbrane RS

Visoki predstavnik Paddy Ashdown je danas čestitao Ministarstvu odbrane BiH na njihovom Izvještaju o sistemskim slabostima u komandovanju i kontroli nad Oružanim snagama BiH, koji je objavljen prošle sedmice. U današnjem pismu ministru odbrane BiH Nikoli Radovanoviću visoki predstavnik je pozdravio neke od preporuka iz Izvještaja.

Međutim, izrazio je nezadovoljstvo činjenicom da Ministarstvo odbrane RS nije na odgovarajući način objasnilo kako to da Ratko Mladić nije otpušten iz Vojske RS do marta 2002. godine. Konstatovao je da Ministarstvo odbrane RS nije osiguralo dokaz kojim se potvrđuje da nijedan pojedinac koji je služio u 410. vojno – obavještajnom centru (umiješanom u nezakonito prisluškivanje) ili je bio u ličnom obezbjeđenju Ratka Mladića, više ne radi u VRS ili Ministarstvu odbrane RS.

Visoki predstavnik je danas odredio 15. mart 2005. godine kao krajni rok do kojeg ministar odbrane RS treba osigurati dokaze da je Ministarstvo odbrane RS poduzelo ove mjere. “U izvještaju je dokazano da je Mladić bio na platnoj listi Republike Srpske do kraja 2001. godine, te nije bio otpušten iz vojske do marta 2002. To je nevjerovatno otkriće. Izvještaj čak identificira pojedince koji su se potpisali na Mladićeve priznanice o isplati”, rekao je visoki predstavnik.

Nemogućnost Ministarstva odbrane BiH da potvrdi da li je u Han Pijesku boravio Ratko Mladić 2004. godine visoki predstavnik pripisuje žalosnom nedostatku sredstava za vođenje istrage koje na raspolaganju ima generalni inspektor Ministarstva odbrane BiH. Visoki predstavnik pozdravlja odlučnost ministra da se objekti u Han Pijeksu zatvore.

“Nije iznenađujuća činjenica da niti jedan dokaz o boravku Ratka Mladica u Han Pijesku nije objelodanjen, imajući na umu da je, na državnom nivou, ministar Radovanović imao na raspolaganju samo jednog inspektora i vozača koji su provodili istragu”, rekao je visoki predstavnik.

“Izvještaj jasno ukazuje na potrebu da se unaprijedi komandovanje i kontrola na državnom nivou, te povećaju sredstva dostupna Ministarstvu odbrane BiH. Izvještaj podržava odluku ministra Radovanovića o razvoju koncepta vojne policije. Ja ću svakako otići dalje od toga i odlučno pozvati na što ranije stvaranje vojnih policijskih jedinica na državnom nivou”, dodao je.

U svome pismu visoki predstavnik je također “čestitao ministru na prijedlogu da se u okviru Ministarstva uspostavi tijelo za finansijsku reviziju.” Visoki predstavnik podržava prijedlog iz Izvještaja da Komisija za reformu odbrane sastavi amandmane na Zakon o odbrani BiH i novi Zakon o službi u oružanim snagama BiH.